

MUSEGA

## Al via la rassegna che met dant joegn, musega e mendranzes

*La lingia de conzerc del Panorama Music de Fascia auza fora artisç de valuta te la cornisc segura de l'ambient da mont portan dant enche chest an l program spezièl JMMJ dedicà ai lengac mendres*

L'emergenza Covid à portà con-seguenzes pesoches soraldut tel setor del spetaçol e la èrts performatives e enche chest istà i evenc de musega e teater daite i è empossiboi o i cogn sotstèr a regoles n muie strentes. Te chest contest ciapa amò più valuta e emportanza la proponetes che desfruta i spazies averc e la beleza de nosc ambient.

Te Fascia l Panorama Music è ruà a la 6<sup>a</sup> edizion. Nasciù da la colaborazion anter la sozietèdes de impianc portamont de Fascia e l'APT con la soziazion de cultura e musega La Grenz, chest event vidà dal diretor artistich Enrico Tommasini l se à vadagnà an dò an esperienza e nonzech, e enche chest an l'è vertech a meter dant n rich program de 12 conzerc tel respet de la distanzes e de duta la prescrizions anti Covid, te anter la natura ma semper en vejinanza de refuges e impianc portamont per ge arseguèr l'azzes a duc.

I conzerc, duc debant, i roda anter i lesc de noscia val, da Fuciada a Col Margherita, da Costabela a Valbona, da Bufaure a Ciampedie, da Col Rodela a Belvedere e Ciampac, ma i roda enche anter i desferenc stii de musega, dal jazz con Mauro Beggio (ai 2 de aost sun Rodela) e Helga Plankensteiner (ai 20 de aost sun Valbona) a la black music con Leonardo Duranti (ai 16 de messèl sul Bufaure) e James Thompson (ai 30 de messèl sun Ciampedie), dai curiosc mix geomusicai de Manuel Randi (ai 26 de messèl sun Ciampac) e Vincenzo Capezzuto & Giancarlo Bianchetti (ai 9 de aost sun Bufaure) fin al

country de Charlie Cinelli (ai 27 de aostsun Ciampedie).

**Per ladin, furlan e catalan... amò più bell!**

Dò l bon èjit arjont te la edizions del 2018 e 2019, enche chest an l Panorama Music de Fascia, col sostegn de la Region Trentin Sudtirol, de la Provinzia de Trent e del Comun General de Fascia, ge à dat gran lèrga a la rassegna JMMJ che porta dant i lengac de mendranza. Se trata de n program de gran relief, che porta dant gropes de joegn musizisç, esponenc de mendranzes linguistiches. Cinch conzerc da no perder che metarà al luster l'aut livel musical di gropes e la doura creativa e contemporanea de si lengac, en particolèr l ladin, l furlan e l catalan.

Se taca en domenìa ai 12 de messèl con la ciantarina de cèsa, Martina Iori da Dèlba, che dò aer vent i doi concorsc internazionèi de nonzech SUNS e LIET del 2014, la è jita inant con la enrescida e la composizion de cianties per ladin, che la porta dant compagnan sia bela ousc con l son de chitara e ukulele e con la formazion oramai colaudèda di musizisç Matteo Cuzzolin al sax tenor, Matteo Rossetto a la chitara eletrica, Marco Stagni al contrabas e Enrico Tommasini a la bateria. L quintet de Martina Iori sonarà sui pré de Fuciada chesta domenìa, ai 12 de messèl, da les 11 da doman.

En domenìa ai 19 de messèl sun Belvedere de Cianacei ruarà envezè dal Friul Massimo Silverio, n ciantautor, chitarist e violoncelist cresciù a la scola de l'etnomusicologh


Giulio Venier e tel medemo temp session man de desvalives projec de tai sperimentèl e eletronic. Silverio ruarà te Fascia a prejentèr sie nef CD «0» adum col percusionist Nicholas Remondino e col cognosciù musizist Leo Virgili, artist ecletich e diretor de SUNS, che compagnarà con tastieres eletroniche e col son del curious e fascinegol theremin, l strument che se sona zenza l tocèr.

Auter apuntamento de gran valuta sarà en jebia ai 23 de messèl, semper da les 11, sun Costabela con Magali Sare e Sebastia Gris. Chest duet catalan de ousc e chitara à vent l'edizion 2019 de SUNS a Udin con na performance de gran efet e te Fascia i prejentarà l nef lurier discografich «A Boy and a Girl» che tol ite toc per catalan e per ingles.

En jebia ai 13 de aost sarà l'ocajon de poder scutèr, dò passa 10 egn, l'esecuzione de n projet de la Grenz che aea abù gran suzess: tesç ispirè a la lejudes ladines, scric da Fabio Chiochetti, metui en musega da Roberto Soggetti e portè dant da musizisç jazz de gran valuta, con Silvia Donati a la ousc, Roberto Soggetti al piano, Pietro Tonolo al sax sopran e tenor, Giulio Corini al contrabas e Roberto Rossi a la bateria. L conzert sarà sun Col Margherita semper da les 11 da doman.

A serèr la rassegna dedichèda ai joegn e la mendranzes sarà endò n artist de cèsa: Stefano Merighi da Poza, con sia ousc e sia capacità interpretativa straordenèra, l'è dò a portèr a compiment n projet de gran valuta per n nef cd che vegnarà fora chest uton. En domenìa ai 23 de aost sun Ciampac l portarà dant sie repertorie che va dal reggae al ska, dal swing al blues a la cianzon d'autor enche per ladin, compagnà da sia band con Niccolò Zanella al sax, Eugenio Cattini a la chitara, Marco Mattia a la tastieres, Filippo Chiochetti al bas e Daniele Volcan a la bateria.

Se trata dassen de n program de gran valuta, che valorisea e fèsc cognoscer la mior produzion musicala ti lengac de mendranza e che merita de aer suzess. Dut l program è da poder troèr sul sit de l'APT de Fascia ([www.fassa.com/IT/Eventi-Val-di-Fassa-Panorama-Music-Festival/](http://www.fassa.com/IT/Eventi-Val-di-Fassa-Panorama-Music-Festival/)) e su la piates Facebook e Instagram de valdifassapanoramamusic. 16



Martina Iori verc la rassegna de conzerc ti lengac de mendranza.



Silvia Donati ciantarina del projet de jazz per fascian «Enresciadam».



Stefano Merighi porta dant sie program per l cd che vegnarà fora chest uton.



Momenc de la edizions passèdes del Fascia Panorama Music, te anter la Dolomites.